
Izveštaj o monitoringu rada Interresorne radne grupe za izmjene izbornog zakonodavstva BiH i nastavak rada na unapređenju izbornog zakonodavstva

Koalicija „Pod lupom“ je 8. aprila održala konferenciju za novinare na kojoj je predstavila Izveštaj o monitoringu rada Interresorne radne grupe za izmjene izbornog zakonodavstva BiH. U parlamentarnu proceduru upućena su dva amandmana koja su se odnosila na uvođenje nestranačke funkcije predsjednika biračkog odbora i javnu objavu imena svih članova svih biračkih odbora kako bi se spriječila trgovina mjestima u biračkim odborima. Predloženi amandmani nisu usvojeni.



Koalicija je sa Centralnom izbornom komisijom BiH usaglasila da će 8 preporuka biti implementirano kroz provedbene akte, dok će Koalicija u narednom periodu nastaviti intenzivno zagovarati preostale preporuke.

Regionalni koordinatori Koalicije "Pod lupom" počeli sa radom

Regionalni koordinatori Koalicije počeli sa radom od 01. maja. Oni će koordinisati radom dugoročnih posmatrača koji treba da edukuju za izbore 3000 građanskih posmatrača.

Regionalni koordinatori, njih sedam, su angažovani na period od osam mjeseci i raspoređeni su u sedam regionalnih ureda tako da svako od njih pokriva određeni broj izbornih jedinica kako bi se obuhvatila cijela država.

Centralna konferencija „Lokalni izbori 2016: Kakvi nas izbori očekuju nakon izmjena Izbornog zakona BiH?“

Koalicija je 17. maja održala konferenciju na temu Lokalnih izbora 2016. godine i izmjena Izbornog zakona BiH. Na konferenciji su održane dvije panel diskusije na temu Lokalnih izbora 2016. godine i izmjena Izbornog zakona BiH. Konferencija je okupila predstavnike zakonodavnih institucija vlasti na svim nivoima u BiH, predstavnike Centralne izborne komisije BiH i lokalne izborne administracije, predstavnike međunarodne zajednice, te predstavnike akademske zajednice, medija i civilnog društva.



Prezentovan rad Koalicije na sjednici PIC-a

Politički direktori zemalja članica Upravnog odbora Vijeća za provedbu mira sastali su se 7. i 8. juna 2016. godine u Sarajevu kako bi razmotrili trenutnu situaciju u Bosni i

Hercegovini. Direktor projekta Koalicije "Pod lupom" i predsjednik CIK BiH su bili pozvani na sjednicu da prezentuju aktivnosti povodom predstojećih lokalni izbora.

Media Workshop

U Sarajevu je 09.06. održan sastanak na kojem su prisustvovali regionalni koordinatori Koalicije i osoblje Glavnog ureda. Izrađen je plan rada Koalicije, definisane ključne poruke za medijsku kampanju, te osmišljen izgled promo materijala i scenarij video spotova za Lokalne izbore 2016. godine.

Predstavljeno tromjesečno istraživanje Koalicije na press konferenciji u Sarajevu

Koalicija "Pod lupom" je 22.06. na konferenciji za novinare u Sarajevu predstavila tromjesečno istraživanje na teme procesa i uslova registracije političkih stranaka, redovnog finansiranja stranaka i finansiranja izborne kampanje u preko 40 država članica OSCE-a, uključujući i Bosnu i Hercegovinu, a u cilju davanja preporuka za unapređenje izbornog zakonodavstva u Bosni i Hercegovini.



Evaluacijski sastanak povodom aktivnosti „Prvi put biram!“

Koalicija "Pod lupom" je zajedno sa svojih 28 edukatora u periodu mart - juni održala 572 radionice širom Bosne i Hercegovine i edukovala približno 13.000 mladih o predstojećim lokalnim izborima i načinu kako se glasa. Dana 17. i 18.06. je održan evaluacijski sastanak u Sarajevu povodom ove aktivnosti. Kako je u 2016. godini planirana edukacija 15.000 učenika, odlučeno je da će nastavak aktivnosti biti u septembru kada će Koalicija dodatno edukovati 2.000 učenika.



Za sve dodatne informacije pratite nas putem weba www.podlupom.org, te na društvenim mrežama - fb, twitter i instagram. Hvala Vam!